

REGLUGERÐ

um breytingu á reglugerð um atvinnuréttindi útlendinga nr. 272 18. apríl 1983.

1. gr.

6. mgr. 3. gr. orðist svo:

Þegar einum eða fleiri útlendingum er heimiluð landvist hér á landi samkvæmt ákvörðun íslenskra stjórnvalda og um er að ræða aðila, sem falla undir samning um réttarstöðu flóttamanna frá 28. júlí 1951 með breytingum frá 31. janúar 1967, skal vikið frá ákvæðum þessarar greinar hvað lengd atvinnuleyfis eða önnur skilyrði snertir til samræmis við ákvæði 17. gr. samningsins.

2. gr.

3. og 4. mgr. 7. gr. orðist svo:

Atvinnuleyfi samkvæmt þessari grein eru bundin við ákveðna starfsgrein og ákveðinn tíma, og skulu slík leyfi eigi veitt til lengri tíma en 2ja ára í senn. Eftir 5 ára samfellda búsetu má þó veita slíkt atvinnuleyfi til ótiltekins tíma.

Þegar einum eða fleiri útlendingum er heimiluð landvist hér á landi samkvæmt ákvörðun íslenskra stjórnvalda og um er að ræða aðila sem falla undir samning um réttarstöðu flóttamanna frá 28. júlí 1951 með breytingum frá 31. janúar 1967, skal vikið frá ákvæðum þessarar greinar hvað lengd atvinnuleyfis og önnur skilyrði snertir til samræmis við 18. gr. samningsins.

3. gr.

7. tl. 9. gr. orðist svo:

Danska, finnska, norska og sænska ríkisborgara, er dvalið hafa 3 ár samfleytt eða lengur í landinu eða taka sér bólfestu hér á landi samkvæmt samningi um sameiginlegan norrænan vinnumarkað frá 6. mars 1982.

Reglugerð þessi er sett samkvæmt 14. gr. laga nr. 26/1982 um atvinnuréttindi útlendinga og tekur gildi þegar í stað.

Félagsmálaráðuneytið, 27. maí 1983.

F. h. r.

Hallgrímur Dalberg.

Óskar Hallgrímsson.

REGLUGERÐ

fyrir Sjúkraliðaskóla Íslands og um réttindi og skyldur sjúkraliða.

I. KAFLI

Markmið og stjórn skólans.

1. gr.

Sjúkraliðaskóli Íslands er ríkisskóli og starfar undir yfirstjórn heilbrigðis- og tryggingamálaráðuneytisins.

2. gr.

Hlutverk skólans er að annast nám sjúkraliða og búa þá undir að aðstoða við hjúkrun, sbr. 8. gr. hjúkrunarlaga nr. 8/1974.

3. gr.

Heilbrigðis- og tryggingamálaráðherra skipar stjórn skólans þannig:

Tvo fulltrúa án tilnefningar, og skal annar þeirra vera formaður, einn samkvæmt tilnefningu Hjúkrunarfélags Íslands, einn samkvæmt tilnefningu Sjúkraliðafélags Íslands og einn samkvæmt tillögu nemenda.

Stjórnin skal skipuð til þriggja ára, nema fulltrúi nemenda, sem skipaður skal árlega. Skólastjóri hefir tillögurétt á fundum skólastjórnar.

4. gr.

Stjórn skólans ræður skólastjóra, og skal hann vera hjúkrunarfræðingur. Æskilegt er, að hann hafi lokið námi í uppeldis- og kennslufræði.

Skólastjóri stjórnar daglegri starfsemi skólans og hefir umsjón með henni.

Skólastjóri ræður kennara að skólanum í samráði við skólastjórn.

5. gr.

Við skólann skal starfa skólaráð skólastjóra til ráðuneytis. Það skal skipað þrem kennurum og tveim fulltrúum nemenda og skulu þeir kosnir til eins árs í senn.

II. KAFLI

Skráning nemenda, námstími og námsefni.

6. gr.

Skráning nemenda er í höndum skólastjórnar og skólastjóra samkvæmt nánari reglum, er þau setja sér.

Inntökuskilyrði í skólann eru:

1. Umsækjandi skal vera 18 ára gamall.
2. Umsækjandi skal hafa lokið námi úr 2. bekk í samræmdum framhaldsskóla (fjölbrautaskóla) í þeim námsgreinum, er Sjúkraliðaskólinn gerir kröfur til, eða hlotið hliðstæða menntun.
3. Heimilt er að veita umsækjanda skólavist, þótt hann fullnægi ekki kröfum 2. töluliðs, með hliðsjón af hæfnisprófum eða öðrum tilteknum matsaðferðum. Skal við mat á slíkum umsóknum meðal annars hafa í huga, að umsækjandi hafi næga þekkingu til þess að geta tileinkað sér námsefni skólans.

7. gr.

Umsóknir um skólavist skal senda skólastjóra. Þeim skal fylgja:

1. Staðfest afrit af prófskírteini.
2. Læknisvottorð.
3. Umsögn frá vinnuveitanda og/eða skólastjóra.

8. gr.

Námstími skal vera 1 ár.

Skólanum skal sett námsskrá er ráðuneytið samþykkir. Skal þar getið um verklega og bóklega kennsluþætti og lokapróf. Til þess að standast próf þarf nemandi að kunna skil á

minnst 50% þessa námsefnis, er hefir verið kennt. Nemanda er heimilt að endurtaka próf einu sinni og heimil endurseta í bekk einu sinni.

Á sama hátt skulu nemendur standast kröfur skólans í verknámi. Skólanum er heimilt að nota bókstafi eða tölustafi til einkunnagjafa.

9. gr.

Skólastjóra er heimilt að óska eftir prófdómara í prófgreinum, og skal þá leita samþykkis heilbrigðis- og tryggingamálaráðuneytisins.

10. gr.

Verklegt nám skal vera 34 vikur og skiptast þannig í sjúkrastofnunum:

10—12 vikur á handlækningadeild,

10—12 vikur á lyflækningadeild,

10—12 vikur í almennu sjúkrahúsi eða á hjúkrunardeild/langlegudeild.

Verklega námið fer fram í stofnunum, er skólinn viðurkennir og ráðuneytið samþykkir. Skólastjóri skipuleggur það í samráði við hjúkrunarforstjóra viðkomandi stofnana.

Að lokinni námsdvöl á sérhverri deild fær nemandinn umsögn er hjúkrunardeildarstjóri gefur.

11. gr.

Forfallist nemandi frá námi lengur en 14 daga, lengist námið sem því svarar.

III. KAFLI

Starfsréttindi og starfssvið sjúkraliða.

12. gr.

Rétt til þess að starfa sem sjúkraliði hér á landi og kalla sig sjúkraliða hefir sá einn, sem til þess hefir fengið löggildingu heilbrigðis- og tryggingamálaráðherra.

13. gr.

Löggildingu samkvæmt 12. gr. skal veita íslenskum ríkisborgurum, sem lokið hafa prófi frá Sjúkraliðaskóla Íslands eða sambærilegu sjúkraliðaprófi hér á landi, viðurkenndu af heilbrigðis- og tryggingamálaráðuneytinu.

14. gr.

Ráðherra getur veitt öðrum en þeim, sem 13. gr. tekur til, löggildingu eða tímabundið starfsleyfi, enda sanni viðkomandi, að hann hafi menntun, sem sambærileg er við viðurkennt sjúkraliðanám hér á landi.

15. gr.

Sjúkraliði hefir rétt til þess að starfa í samræmi við 16. gr. reglugerðar þessarar. Honum er óheimilt að stunda sjálfstæð hjúkrunarstörf.

16. gr.

Sjúkraliðar skulu starfa undir stjórn hjúkrunarfræðings.

Störf, er sjúkraliði á að kunna skil á að námi loknu, eru í aðalatriðum þessi:

Umbúnaður. Umbúnaður og skipting á mikið veikum sjúklingum með hjúkrunarfræðingi.

Sjúklingi leiðbeint varðandi persónulegt hreinlæti. Sjúklingi þvegið um andlit og hendur. Hárhirðing, munnhirðing, neðanþvottur, fótahirðing. Sjúklingur baðaður (í steypibaði, baðkeri, rúmi).

Hitamæling. Púlstalning. Blóðþrýstingsmæling.

Fylgst með líðan sjúklinga. Kalli sjúklinga svarað og flutt skilaboð.

Fylgst með úrgangsefnum líkamans. (Hægðir, þvag, uppgangur). Gefin og tekin bekja. Gefin stólpípa. Tekin og merkt sýnishorn. Mælt magn og eðlisþyngd þvags. Eftirlit með þvaglegg og þvagpoka.

Varnir gegn fylgikvillum sjúkdómslegu, t. d. varnir gegn legusárum.

Framreiðsla matar. Sjúklingum hagrætt fyrir og eftir máltíðir. Þeir sjúklingar mataðir, sem ekki geta borðað sjálfir. Mataráhöld fjarlægð.

Aðstoð við endurhæfingu sjúklinga, fótaferð, fataskipti, hreyfingar, notkun hjálpartækja (hjólástóll, hækjur, göngugrind). Hreinsun á hjálpartækjum og hjúkrunargögnum.

Umbúðir gerðar. Tekið við blómum og öðru til sjúklinga og gestum þeirra leiðbeint. Hirðing á blómum, blómavögnum og blómaskolum. Hirðing á sjúkrastofum, skolherbergjum og líni.

Aðstoð við umbúnað líks.

Sjúkraliðar mega ekki taka til eða gefa lyf í sjúkrahúsum.

IV. KAFLI

Ýmis ákvæði

17. gr.

Skólinn skal annast um framhalds- og endurmenntunarnám sjúkraliða með skipulögðum námsbrautum, eftir því sem þörf krefur. Námskeið, skv. þessari grein, skulu haldin árlega og taka a. m. k. 3 mánuði hvert. Ráðuneytið samþykkir námsskrá fyrir þessi námskeið.

18. gr.

Kostnaður við rekstur Sjúkraliðaskóla Íslands skal greiddur úr ríkissjóði.

Stofnanir, sem hafa nemendur í verknámi skulu greiða þeim laun þann tíma samkvæmt samningi er nemendur og fjármálaráðuneytið gera með sér. Þær skulu einnig sjá nemendum fyrir starfsklæðnaði og þvotti á honum. Nemendur skulu ekki taka laun meðan þeir eru í bóknámi.

19. gr.

Á þeim stöðum, þar sem ekki reynist unnt að fá hjúkrunarfræðing til starfa, má ráða sjúkraliða til hjúkrunarstarfa um skemmri tíma, og skal hann þá starfa undir stjórn læknis. Leita skal samþykkis ráðuneytisins hverju sinni.

Reglugerð þessi, sem sett er samkvæmt heimild í 8. gr. hjúkrunarlaga nr. 8/1974, öðlast þegar gildi. Jafnframt fellur úr gildi reglugerð nr. 586 frá 30 október 1980.

Heilbrigðis- og tryggingamálaráðuneytið, 25. maí 1983.

Svarar Gestsson.

Ingibjörg R. Magnúsdóttir.